



Inatsisartuni ilaasortat
Knud Kristiansen, Siverth K. Heilmann
Atassut
-/Maani

Inisseeqqittarneq pillugu § 37 naapertorlugu apeqqut nr. 2012-286-imut akissut

Asasakka Knud Kristiansen aamma Siverth K. Heilmann

Aallarniutigalugu apeqqutit saqqummiussasi pillugit qutsavigiumavassi, suliaasaqarfimmi paatsoonerit arlallit aaqqiissuteqarfiginissaannut erseqqissarnissaannullu periarfissimmannga.

Matumani apeqqutersi issuarneqarpoq, akissutinik malitseqartinneqarluni.

Illuut A/S-ip Nuummi inissianik, illunik attartortut akiligassaqarpallaarneri pissutigalugit anisitaasartut maannakkut innisikkallartarfissaannik (genhusning) pisortat pilersitsinialerput, qanoq iliorluni Naalakkersuisut qulakkeerniarpaat inuit inisikkallarneqarneqartut inuppalaartumik, ataaqqinassuseqartumillu avatangiiseqartillugit inisikkallarneqarnissaat?

Aallarniutigalugu erseqqissaatigissavara, matumani attartortut akiliisinnaassuseqartut – tassalu akissallit – kisiannili akiliinissamut piumassuseqanngitsut pineqarmata. Attartortoq akiliisimanginnini tunngavigalugu attartorunnaarsinneqannginnermini akiliinissamut eqqaasinneqartarpoq, aammalu akiitsuminik akileeqqullugu kajumissaarneqartarluni. Tamatuma kingorna suliaq kommuni inunnik isumaginnittoqarfiannut ingerlateqqinneqartarpoq, kommuni attartortumut ikiuussinnaanersoq paasiniarlugu. Kommuni ikiuunnissaminut itigartitsippat periarfissaq ataasiinnangussaaq, tassalu attartortup attartukkamini anisitaanissaa.

Anisitaasunit arlallit anisitaanermi inissiami tunniunneqartumi najugaqaannartunik ilaqartartut Naalakkersuisunit misilittagarineqarpoq. Inissiamik atugassinneqarnermini inissiami ukiorpassuarni najugaqarsinnaasarput, inissiamik namminerisaminnik, ineqarnermut akiliuteqarfissaminnik pissarsiniaqqinnissaminnut kajumissuseqaratik. Inoqarpormi ilaatigut ukiuni qulini akiliissanatik ineqartinneqartartunik. Taamaamat ajornartorsiut tamanna Naalakkersuisut isummerfigisariaqalerpaat.

Kalaallit Nunaanni politiit attartortut inissaaruttussaatillugit attartortunik anisiterusuttangimmata, inisseeqqittarfimmik sanasoqassaaq. Kalaallit Nunaanni eqqartuusariaaseq pillugu inatsit pillugu nalunaarummi nr. 305-imi, 30. april 2008-meersumi § 633, imm. 3-mi allassimavoq, *"Eqqartuussutinik naammassisitsiniaasartup itigartitsissutigisinnaavaa inissiamik attartukkamik attartortumik anisitseqqusissut, attartortut taassumaluunniit inoqutai tamatumuuna inissaaruttussanngussappata aammalumi pissutsit anisitseqqusissutip naammassiniarnissaanut akerliuppata."*

Inisseeqqittarfik tassaassaaq, attartortup attartukkamini sumiginnaanerata kingunerisaanik anisitaaneranut atatillugu unnuiffissatut neqeroortigineqartussaq.

11.december 2012

Sags nr. 2012-077687

Dok.nr. 1083907

Postboks 909

3900 Nuuk

Tlf. (+299) 34 50 00

Fax (+299) 34 54 10

E-mail: iaan@nanoq.gl

www.nanoq.gl

Nuummi inisseeqqittarfimmik 285 m²-t missaannik angissusilimmik, 60-inik siniffilimmik sananissaq aalajangersimasumik pilersaarutigineqarpoq. Tassani immikkoortortat marluussapput. Angutinut immikkoortortaq arfinilinnik initalik, katillugit 40-nik siniffilik, aammalu arnanut immikkoortortaq pingasunik initalik, katillugit 20-nik siniffilik.

Immikkoortortat marluusut tamarmik immikkut uffarfeqassapput perusuersartarfeqassallutillu, nalinginnaasumik ilinniarfinni, naluttarfinni timersortarfinnilu ilisimaneqartunik. Perusuersartarfiit uffarfiillu igalaaqanngillat. Taakkununga taarsiullugu qitiusumik silaannarissaatinik ikkussuisoqassaaq. Perusuersartarfiit uffarfiillu matuneqarsinnaassapput.

Taakkua saniatigut isersimaartarfimmik/igaffimmik ataatsimoortumik, arfinilinnik nerrivilimmik, katillugit 36-inut issiavissaqartumik sanasoqassaaq. Igaffik nalinginnaasunik atortoqartoq erruisarfeqassaaq, kissarsuuteqassalluni, uulliiveqassalluni, maskiinamik erruissuteqassalluni, nillataartitsiveqassalluni qerititsiveqassallunilu. Aamma puuguttanik, nerinermi atortunik, iganik, tiitorfinnik, immiartorfinnik, skålinik, niutsivinnik il.il. peqassalluni.

Torsuusamut/isaarissamut allaffik innarluutilinnullu perusuersartarfik inissineqassaaq. Taakkua saniatigut teknikkeqarfimmik/eqqiaanermut atortuusivimmik errorsivilimmik panersiivilimmillu peqassalluni.

Inisseeqqittarfik kisimiittunut aappariinnullunniit naleqquttuusaaq, taamaalillunilu ilaqutariinnut meerartalinnut atorneqartussaananu. Meeqqat inisseeqqittarfimmi najugaqartussaassanngillat najugaqarsinnaassanatillu. Anisitsinermi anisitaasut meerartaqarpata suliaq kommunimit tiguneqassaaq, tassanilu anisiteriaatsit, ullumikkut atorneqareersut atorlugit sullissisoqassaaq.

Inisseeqqittarfik ulluinnarni ualikkut ammartassaaq, ullullu tulliani ullaap tungaani matoqqasassalluni. Ulluunerani eqqiaanerit, aserfallatsaaliuinerit aammalu illumik pequtinillu misissuinerit isumagineqartassapput. Inisseeqqittarfimmi najugaqassagaanni, inissiamit najukkamit anisitaanermut atatillugu tassunga innersuusisoqartassaaq. Tassalu inisseeqqittarfik angerlarsimaffeqanngitsunut unnuisarfiussanngilaq, kisiannili sionratigut attartortuusimasunut inisseeqqittarfiussaaq, taakkulu unnuinermit ataatsimut 50 koruuninik akiliisartillutik inisseeqqittarfimmi najugaqarsinnaassapput.

Inisseeqqittarfik angerlarsimaffippalaartuussanngimmat ilumoorpoq. Taanna sullissiviusaaq ilaqutariinnut angerlarsimaffippalaartuunngitsoq, unnuinissamulli periarfissaqarfiussaaq oqquiffiusinnaassallunilu. Inisseeqqittarfiup taamatut siunertaqaraluartoq anisitaasimasut aamma toqqissisimanartunik avatangiiseqarnissaat pingaaruteqarpoq. Tamannarpiaq pissutigalugu matut ruko-nik matuersaaserfeqassanngillat. Pinngitsaaliilluni inimit iserluni matup parnaarnissaa, aammalu najugaqartumik najugaqartunillunniit innarliinissaq ajornartinneqassaaq. Soorunami kisimiissinnaanissaq eqqarsaatigalugu uffarfiit perusuersartarfiillu toqqissisimanartumik paarnaarneqarsinnaassapput.

Inisseeqqittarfimmi imigassartornissaq inerteqqutaassaaq, taamatullu tamakkiisumik pujortarfigeqqusaassanani. Tamatuma saniatigut nipiliornissamut, persuttaanissamik

qunusaarinissamat imaluunniit persuttaanissamat il.il. maleruagassaqaassaaq. Maleruagassat taakku unioqqutinneqarnerini erniinnaartumik anisitaasoqartassaaq.

Inisseeqqittarfiup ingerlanneqarnerinut missingersuutaagallartut ukiumut 1.440.000 koruuninut missiliorneqarput, taakkulu saniatigut akissarsianut aningaasartuutissat 1.000.000 koruuniussapput, tassalu atorfinnik sisamanik naleqassallutik. Atuisut akiliutaannit isertitat ukiumut 650.000 koruuniussasut naatsorsuutigineqarpoq. Aningaasanit sinneruttut 1.790.000 koruuniussat Nuummi najugaqarfinnut akilersinneqartassapput, ukiumut m²-mut 12,75 koruuniussallutik. Inissiamut 74 m²-nik angissuseqartumut qaammammut ineqarnermut akiliutit 78 koruunerpiamik qaffassapput. Aningaasat ilanngarneqaratik inisseeqqittarfimmut aningaasartuutinut matussutigineqartassapput.

Neriuppunga suliaq pillugu paasititsisimassallunga, aammalu annertunerusumik paasisaqarusunnermi akissuteqarnissamat piareersimavunga. Inisseeqqittarfik sananeqareerpat atorneqalereerpallu takuniarnissaanut tikilluaqqusaavusi.

Inussiarnersumik inuulluaqqusillunga

Jens B. Frederiksen